



UNIVERSITÄTS-
BIBLIOTHEK
PADERBORN

Tractatus De Censuris Romano Pontifici Reservatis

Ugolinus, Bartholomaeus

Venetijs, 1609

Vers. Nec non falso fabricantes litteras Apostolicas etiam in forma Breuis.

[urn:nbn:de:hbz:466:1-61365](https://nbn-resolving.org/urn:nbn:de:hbz:466:1-61365)

Verf. Nec non falso fabricantes litteras Apostolicas etiam in forma Breuis.

S V M M A.

- 1 Litteras Apostolicas falso fabricare quid sit.
- 2 Litteras Apostolicas falso fabricare quot modis contingat.
- 3 Litteras Apostolicas falso fabricans in excommunicationem incidit, quæ excommunicatio declaratur, quousq; pateat.

IN hac parte excommunicantur, qui litteras apostolicas falso fabricant, quam excommunicationem ut dilucidiorē habemus, præmittenda hæc sunt. Primum quid sit fabricare, deinde quid falso litteras fabricare, postremo quot modis contingat litteras falso fabricare.

Quoad primum igitur fabricare nil aliud est, quam aliquid construere, vel nouum construat, ædificium, vel antiquum reficiatur. argument. capit. consuluit. de iudæ. & l. fin. C. eod. quod quidem verbum de ædificiis proprie dicitur, quamuis ad multa alia transferatur, & fortasse dictum est a nomine Fabri, & a græco nomine *δικοσ*, quod significat domum, quasi significet verbum hoc fabricare domos, & ædificia facere.

237

1 Quoad secundum autem falso litteras fabricare, quatenus ad rem nostram pertinet, nil aliud est, quam litteras conficere sine mandato, & consensu Romani Pontif. eiusve, ad quem mandatū hoc est, & hoc tam quo ad sententiam ipsarum, quam quo ad subscriptionem eorundem. arg. cap. quam graui, & c. licet, & c. ad falsariorum. de crim. fals.

- 2 Quoad tertium vero duobus modis contingit litteras falso fabricari, primo, ubi ea omnia falsa sunt, ex quibus litteræ conficiuntur, utpote ubi quis ipsemet litteras conficit, & signa, aliaque omnia, & filum etiā falsa apposuit, habentia tamen figuram eorum, quæ vera sunt, sicut faciunt, qui pecuniam adulterinam fabricant, exempli gratia litteras huiusmodi quis conformauit & signo simili ei, qui est Romani Pontif. quod cudendum sibi curauerat, signauit, & de hoc litterarum genere agitur in cit. cap. quam graui, ubi ponit Romanus Pont. nonnullos modos, quibus comprehendatur, quando litteræ falsæ sunt, & apertius in eod. capit. licet, uer. Prima species falsitatis hæc est, ut falsa Bulla falsis litteris apponatur. Secundo loco falsæ fiunt, ubi conficiuntur litteræ contra mentem Romani Pontif. sed tamen aliquid de ueris litteris apponitur, ut filum de uera Bulla, quod multis modis contingit, ut dicitur in eod. capit. licet. uer. Secunda, cū multis seq. eod.

eod. & hæc notanda sunt, nam ex his habetur in quam sententiam accipienda ea iura sunt, scilicet citat. c. licet, & c. quam graui. de crim. fals. nam in cita. c. licet, in prima parte agitur, de fabricantibus litteras falsas, in versic. Quinta agitur de falsatibus veras litteras Apostolicas, sicut etiam in c. quam graui. de fabricantibus litteras falsas. His sic præmissis, iam regulam ponamus.

In excommunicationem hanc igitur incidit, † qui litteras Apostolicas falso fabricat, id est, qui fabricat litteras nomine Romani Pont. cum tamen id ei mādatum non sit, & sic fallum est Apostolicas esse. Differt igitur casus hic a superiore, nam ibi excommunicatur qui falsant, ac vitiant litteras, quæ vere apostolicæ sunt, hic vero eos, qui litteras sibi tales confingunt, quæ excommunicatio locum habet in omnibus aliis casibus, quos posuimus in antecedentibus regulis.

Item excommunicatio hæc afficit fabricantem huiusmodi litteras, cuiuscunque generis litteræ sint, & sic uel gratiam, uel iustitiã contineant, uel in forma Breuis, uel in forma ordinaria eas fabricet, cū ob uerba illa, litteras Apostolicas, quæ generalia sunt, & ob id generaliter sunt intelligenda, arg. l. r. §. & generaliter. ff. de leg. præst. tum ob dictionem illam, et in forma Breuis, quæ dicitio explicat casum magis dubiū, & impli-

cat, seu continet casum minus dubium.

Tertio excommunicatio hæc afficit eū, qui nō modo litteras totas falsas fabricat, verum etiam qui ex parte, utpote addendo falsis uerum signum, ut habetur in cit. c. licet. de crim. fals. quod fecisse quendam, & grauius punitum fuisse audiui, qui litteras quasdam a se factas furtim signauit signo Rom. Pontific.

Postremo afficit excommunicatio hos fabricantes, esto deinceps illis non utantur, nam Bulla excommunicat fabricantes, & non considerat ipsis utētes, ergo nec nos. arg. l. de pretio. ff. de pub. in rem act. Hi omnes ergo in excommunicationem hanc incidunt. Quam tamen effugiunt primo, qui nondum eas perfecissent, quæ tamen exceptio mihi non placet, quoniam Bulla excommunicat fabricantes, at qui incipit fabricare, fabricat, ergo & in excommunicationem incidit. Hanc igitur pœnam euadent, qui litteras huiusmodi facerent, quo formam & modum eorum discerent, utpote est nouitius quidam scriba, qui fabricat sibi, quo eas fabricandi notitiam consequatur, & non id facit, quo eas falsas faciat, nec quo illis quis utatur, sed iam ad postremam partem huius capituli ueniamus.